

摘藻堂四庫全書薈要

集部

欽定四庫全書薈要卷一萬六千二百十六

集部

秋澗集卷六十

元 王惲 撰

碣

大元國故尚書省左右司員外郎韓公道碣

銘 并序

夫朝廷山林之士有往而不返入而不能出者惟其  
勇於靜退貞不絕俗是則為丈夫之事吾於鄉先生  
韓公得之矣公諱仁字義和父顯有融德不耀公甫

冠而孤事母以至孝稱好學強識孜孜不倦聞一善事樂為而不厭正大間舉孝廉辟為州孔目以能充元帥府令史方羽書文馳諸務控惚際公勵精所事極為上官所推重番繹史安天合為相友善壬辰北渡隱居鄉間澹然無所營庚子歲詔行臺於燕開幕府選叅佐得良能為亟用安侯薦首聘公充尚書省都事癸卯春以國計北覲上詢以金粟川流蘿圖鞏固將何策可濟對者以十數獨公敷陳詳明簡而得要

有鑒古訓用賢材之說上喜甚仍奏天下困窮者實繁  
其徒方發政施仁之秋宜子惠俾霑大賚允焉迄今貧  
子月給廩料蓋自公伊始是年秋丁母梁氏憂尋奪哀  
起授左右司員外郎公早夜在公以吏務自任郎中李  
獻卿才望重兩朝亦許公和光解紛能就吾事又明年  
冬以祔母夫人得告南歸既襄事偕內子張氏棄俗入  
道號逍遙子遂西遊太華終南諸山黃冠野服偃然閱  
世如老松卧雲壑者逾三紀焉公資明淑生平與物無

忤其薦賢周急有大過人者宗族藉之通達者甚衆嘗

買僮即約之曰汝等以世故不幸及此義則黽勉相從

否則任渠所往晚節專以方書濟人為事聞一秘方奇

訣求訪百至易千金不恡歲久得益多如烟霞醫林等

集悉鋟梓流布猶虞所傳未暢擇標治者遍書閭巷壁

間京師物繁歲多奇疾賴公起死者不勝紀例來謝辭

不見曰吾庶幾道念濟苛苦而已餘何計當時少傳竇

公亦以醫方談客多獵神農經所載為用公則博採經

驗所謂海上方者錄之無遺二公雖趣向不同而博施則一也故竇韓之名並傳于世先是道人謝志賢等歆公進退有道心存濟物殆非尋常所可及遂請主神寶修真二觀餘三十年奉公如一日公有二姪曰天祐恭鹽提舉次德旻由後衛從事充樞密院令史德旻以公耄期迎至家庭與妻苑氏侍養送終禮無少憾士論賢之公以至元十九年十月望日考終牖下享年八十有四某月日將歸窆汲縣耿岡之新壠墓須銘以鄉耆

故來屬筆其敢以蕪斐辭銘曰

顯允韓公生而淑質陳力周行孝廉應辟移而為忠載  
揚厥職濟物之心一何云亟漢署千官含香入侍經國  
之對允合睿思片言回春仁者之賜脫屣榮貴神武挂  
冠退身急流尤人所難全真為教樂在一簞青囊集驗  
救夫世瘵旁搜博施一壺市間保合太和浩浩其天我  
鍊我形我駐我顏較彼獨善九鸞一鷓棲遲有窠逍遙  
有篇青山白雲玄門老仙黃岡北原睠焉故山惟耿新

壠繫公改遷魂兮來歸諒先生之所安

大元故濠溪先生張君墓碣銘

并序

余官晉府者四年得進修之士一人曰濠溪張君每暇相與往來把酒論文最可尚者君無求于人人之有得于君殊冲然也私自念異時禮文與舉吾儻與當任渠責及承乏翰林君墓草已宿已未夏其子思敬來京師謂予以墓銘為請慰唁餘為歎歎者久之言猶在耳其忍以不敏辭君諱著字仲明姓張氏世為襄陵縣張相



里人曾祖諱某雅重然諾顧義所在雖死生以之祖愿  
父彬皆潛德不仕讀書治田子孫相傳以為家法君少  
穎悟不待勉勵卓然自志于學國初戊戌歲設科取士  
君以詞賦中選既而嘆曰士當遠大自期雕蟲篆刻將  
何為哉適貽溪麻先生洎前進士兌齋曹文來主經局  
君喜且不寐曰今而後吾學有所正矣遂刮去故習沈  
潛伊洛諸書雖飢渴寒暑貧窮得失不易其初心所謂  
道之體用文之華實深涉其源流咀嚼其膏味積而為

文詞發而為事業不盈不矜介然家居以樂育諸生為  
業中統建元願齋張公以直道清節宣撫河東廉君才行  
擢主潞城簿政廉能以畏愛稱明年公去事齟齬不可  
為以親老西歸有司累辟不就至元乙酉用薦者授平  
陽路儒學教授於是衆論大厭士風為一變先生年彌  
高德彌邵學益博文益竒士友知所依嚮吏民咸有矜  
式秩竟不聽其去者逾再考厥後子思敬自南陽教官  
來省聞彼中風土樂焉曰名山大川平日所願見遂命

駕南遊以至元壬辰夏六月廿六日考終寓舍享年六

十有九初娶陶寺里趙氏一子思敬二女長嫁同邑王

黼次適洪洞梁龜齡繼室曲沃靳氏孫男二曰世植世

衡思敬以家學今克隆福宮宮教先生資明亮色夷而

氣清為人誠厚寡慾不戚戚於貧賤與人交始若疎澹

久之愈敬而愛人百負之終不較望而知為雅德君子

其成就後進為已任故晉人多文名而達者多出其門

竊惟亡金百年來平陽號稱多士每歲舉子赴選大約

數倍諸郡至白首場屋庶幾一第餘有不暇及者唯君  
年甫冠即能知所學所從拔出習俗潛心古道踐履外  
詩文雜著曰濛溪集者五百餘篇何多矣哉晉絳諸人  
未之有也況一辭一藻典雅有法理明辭約以自得為  
主是可銘銘曰

四科稱賢曰德與藝其在聖門用不偏廢文乃道輿經  
天緯地苟遺其本剽竊何異利祿科場疇非誕誇聯綴  
補緝是何言邪濛溪為學其復不遐洗心程張正藝曹

麻閉門窮經其書滿家玉佩瓊琚粲焉辭華含章時發  
其助也多士之生世濟時行道時既我垂立言明教生  
崇沒傳朝菌夕蓼達人太觀彼此奚較大川河宗名山  
華崧地靈氣異先生所鍾一朝長逝杳焉飛鴻世皆知  
仁智之所樂吾獨為歸根返壑乃先生之所終凌倒景  
而不滅其元精耿耿固浩乎其不窮適來吾時適去  
吾從先生之心與造物也從容尖山西東相里新宮我  
銘斯石如勒景鐘雖陵遷兮谷變尚知為濠溪先生之

封

故趙州寧晉縣善士荆君墓碣銘并序

元貞元年春廉訪荆侯改道北燕過京師來謁再拜以  
先表屬筆因念予與侯初定交于癭陶一見如平生後  
十年復會于東楚握手道舊勉予南行忠厚之氣霽然  
萃顏間令人有不能忘者今以是來託載惟疇昔其敢  
以固陋辭謹按典瑞少監焦養直善狀君諱祐字伯祥  
趙之寧晉人世陶汶濱遠祖暨禰以改工是圖曰與其

供器用於一鄉，曷若以善及人，為愈於是。板行五經等，不二十寒暑，荆氏家籍布滿河朔。君甫冠而孤，每以保大家業為志。貞祐兵起，取五經、泰和律、義篇、廣韻、板、閤、墟、壙中，亂定來視，盜發掘無幾。君悉力補購，遂復為完部。或者云：初藏書時，善本固多，惟取是三者，何哉？曰：經者道之本，法者治之具，韻者字之始，文籍所由生，其為善已多聞者，謂知本于時。官府生聚，雖稍稍有立詩書法律，晚生後輩，不知為何物。一旦得是，如瞽者復明，迷

者之知津也而又印模精取直廉故售者廣屋日為之  
潤所可重者積而能散縣人王壹者坐事累繫獄吏挾  
私欲死之君力與營救彼不顧且諷而微賄竟傾貲出  
之渠來謝却不見曰吾區區若然者憐爾罔陷非辜餘  
何有壬子歲州縣通籍冒占者有禁里嫗瞽而來依者  
惻然以乳姆收恤轉易書輩往往宿負審其寔既折元  
券復惠之書嘗有以女奴來償者辭不克聘而却焉斯  
皆風義矯矯人難能者率樂為之故鄉里無親疎以善



人稱君以丁巳秋邁疾遺命仲子元綱曰伯叔二喪未克葬汝勉襄大事以卒吾志言終而逝實是年八月八日也壽五十有九歲先塋昭穴君資和易處事明敏終以失學為愧憾及諸子長皆教之讀書嘗訓飭曰吾已面牆無及今幸嗣先業庭戶間書帙紛縉豈有資人進修賢不自力將何以免君子之譏且先世易治而裘所期正爾汝曹其勉旃君初娶劉氏繼室蘇氏生四子長國器中戊戌詞科次國用善屬文皆前卒次元綱自幼

有成人風君嘗語所親異時保家子也竟如言季幼紀  
為人雅重信道篤少從敬齋李先生學所得為多由典  
瑞貳卿擢任風憲今為山北遼東道廉訪使女一適進  
士張景賢孫懷寶男孫九人曰諶曰詢曰誠曰謙曰謚  
曰誼曰諒曰詡曰陬女孫五人一在室餘俱適士族曾  
孫九女孫如之於乎盛哉予然後知善惡之報至子孫  
而後定者審矣銘曰

繫士居業擇術是先有篤者志善乎變遷捨鈞治書理

幾於研顯允荆君思深業專誓教子而亢宗見藏書之  
有權要本孝義奉而周旋萃英敷華煥乎簡編迪我後  
人學者賴焉磊落載腹宛從蹄筌積厚能散憫窮拔寃  
不有其址委順百年慶流後裔子孫嬋媿人定彼勝其  
然亶然二子翩翩遺珠在淵仲克世荷愿而稱賢季由  
近侍三使輜軒較夫善利孰大斯傳固惟是稽古之力  
實資藉之所緣欲報之德有昊者天刻我銘章于晉之  
阡遙追來孝以慰下泉異時推耆德而配鄉社尚有攷

于瑤鐫

洪巖老人石琰公墓碣銘并序

公姓石琰氏諱德玉字君寶遼東蓋州人疎髯炯目氣  
骨臞清超超然如萬里之鶴貞祐初以良家子從軍效  
夏折橋功得官積勞至武德將軍北渡後歷仕在相衛  
間母杜氏唐相如晦後公天性能孝愉色婉容班衣垂  
白朝夕孺慕雖菽水無餘有南陔白華之志時杜氏年  
登八秩清修絕葷茹素日庭除間生白菊百餘本擷去

復茁者數月人以為孝感所致時名公贈詩有似憐甘

旨闕春風茁玉芝之句

闕

趨人之急逾于

已私至遇不闕

竹木花石時釀名酒

客至輒闕

而後已眼花耳熱與之

扶策闕

之某處手植而即蕃者也

此闕

眇柯怡顏喜津津溢眉睫

間曰吾且

闕

壁矣嘗種竹當戶或謂太迫

曰待其蓂茂秋霽月之時俾清樾透簾為此君寫生耳

故終日翛然對之瀟灑為樂其清澹如此晚年游心命書人有問必以修己安分為答能此不待孤虛旺相吾言固有徵矣歲丙子公年八十有五嘗繪洪山歸隱圖以自歌其所樂因號洪巖老人是歲冬灑然而逝若委蛻焉孺人劉氏能遂公初心主治中饋不知其為貧家也生女子二人長適御史康天英次適河東道提刑按察使姜或家府與公交款曲篤世契三十年一別終天有恨何如尋步入街西故里眴睽竹樹慨然有聞遂懷

人之愴老淚濡毫而有斯作銘曰

貧而樂有類乎黔婁心而隱似慕乎德翁事親極融融  
之樂逢辰出蹇蹇之忠布衣歸來默而自容將徘徊而  
孰友侶藜藿而伍巖松生也順事沒寧吾躬古之所謂  
鄉先生死而祭于社者其處士之堂封乎

大元故廣威將軍寧晉縣令李公墓碣銘并序

公諱讓姓李氏其先易水黃山人也父海資善良世樹  
藝為業公既孤母張氏以儉持家就熟南遷至寧晉唐

城鄉愛其風土遂占籍為縣人公初生顛骨有異狀及  
冠美鬚髯聲音如鐘為人善騎射勇于赴義為一方推服  
貞祐初河朔失守所在寇盜充斥日相吞噬公慨然輟  
耕隴上團結鄉豪游獵陸澤荆藿間以保庇井邑為事  
蓋有所需以明歸附之志歲己卯天兵南下公與兄直  
首率里人迎拜努爾諾延于軍門嘉其效順授直行寧  
晉縣事公管軍總校仍聽元帥蔡國公節制時歲荒民  
飢道殣相望田東有水柵曰歷城大澤瀰漫周浸百餘



里菱芡魚鳧資生之物甚富民往依大獲厥所庚辰秋  
金冀州將柴茂以兵來取兄與公力戰而前直死焉公  
憤大兄敗沒衆又失所庇以圖報復瀝血為誓雖食頃  
不忘也繼從縣長王帥復奪其柵居無何茂復合大勢  
來爭前次滿氏公聞之盡匿精銳于瀝旁二十里叢葦  
間以弱誘茂令之曰伺彼過聽金聲而作親驅數百人  
前逆鋒纔交即佯北還茂逾紀氏塢金鳴伏發茂腹背  
受兵大挫其銳公回戈追奔五戰皆捷自是冀人聲燭

不敢復窺潯垠矣歷城用以安全帥閫酬勞授主本縣簿乙酉冬武仙以真定叛麾下劇節副鄭進等乘勢擄掠趙癭陶迤東悉為墟丘公度力不可支收合餘衆乃與鼓藁二主帥合勢併破劇鄭諸砦載數百級而還所失保聚生齒皆得復故丙戌冬仙復令劇鎮戍趙州明年春從大兵規取克焉時太師穆呼哩以奏得專封拜錄公前後功授公行鼓城帥府右監軍並授銀符使顯異焉既而陞克本縣令以寧昌為世封於是招流亡布

恩惠盡井開起市集廛居有貿易之利田里無追呼之  
擾四民樂業外戶為不扃矣又為勸田務抑游惰扶寡  
弱治奸蠹是又公之所必行而求自慊民有衣食不自  
給者公發私藏以贍之富足帥府聞之為復其三年貴  
矣公必耕而食蠶而得衣居常以榜揭門扉私囑干謁  
請無相覲其廉守如此癸丑春以老致仕令男天秋嗣  
職優游里社日課子孫耕鑿為務嘗斧桑田間或勸之  
公曰官時來耳為農吾家素業我若爾兒輩尚情而自



數百指悉縱遣為良曾無鬻身分役之責人人欽其德厚云天祿性孝義伉伉有父風以北孟舊瑩屢為漳浸所嚙遂改卜于此既襄事贄禮幣百拜來請銘予方問俗汶濱見其遺黎故老脫離兵革六十餘載猶為懷思王李諸人眷眷不忘有配社尸祝之報嗚呼貞祐之亂可謂離且瘼矣元元之民莫適所歸不為人所魚肉即轉死溝壑如王李諸公雖奮棘矜起壠畝至于父子昆弟出死力角羣豪經營捍蔽使一方奠安又識夫天運

所在挈民去危邦而就興國誠亦出人意料一時賢豪  
者也甫定後復能俾官府生聚日就完好今歷官鄉曲  
歲時拜墓于于而來者皆曩時不能自存之嗣續也其  
德民之厚感民之深又何止童不雉捕長江之虎渡者  
哉其宜子孫繩繩蟄蟄皆有所立然後知德施于民功  
被一時者天之垂報何其豐且阜哉銘曰

癭陶北邙里號下王顧瞻佳城蔚乎蒼蒼是為晉長李  
公之藏惟是李公千夫之防果毅之勇木訥之剛奮身

壠畝舉圖義匡貞祐南播雲擾之倣割據侵陵互相魚  
肉民匪殲夷轉死溝谷宛彼歷城居水之腹菱芡魚鳧  
大益不足聞公來依襁負相續如鹿走音如鳥棲木四  
境騷然獨為樂國耿氏昆仍旌旗部曲既復兄讎又知  
所屬草昧初分官府始置戢我武幹明夫吏治內守以  
廉外方以義撫循有方興滯補弊扶弱抑強繩姦束吏  
百戰遺黎竟保終惠民之戴公頌聲噦噦尸而祝之懷  
恩罔替勒銘豐碑尚克永世

大元故河中府南北道船橋總管謝公墓碣銘

井序

公諱某字仲進其先燕之香河人世守儒業父闕金吾

衛上將軍河東路總帥公其仲子也為人性行淑均沈

實有顧慮既冠嘗從父西破川蜀每領牙隊居前當破

竹際掩目隱心未嘗以嗜殺為快雖執訊獲醜力為全

活者甚衆用勞充秦鞏路軍儲大使辦集有方餉道為

不乏丁巳夏先帥薨君實主其喪線杖瘠立躬起塋壠



棺衾儀物既易可觀會者大悅復樹豐碑昭德神道其

於新阡有光焉大兄維石襲父職沒軍中行臺檄君以  
例繼執不可曰兄念天顯極友愛顧某不啻若手足然  
家事一聽予處鞠立之責正在今日竟以其嗣住代其  
遙追永言之思友于恤孤之義益終身焉凡其過於人  
遠甚者多類此晚節以故侯失將駕下澤乘欸段遊居  
中條田間耕牧卒歲裕如也至元己亥冬十二月廿有  
六日以疾終平陽府崇道里私第之正寢得年五十有

五官至河中府船橋總管越三日厝于府東神泉鄉之南里原從遷壠也萬口稱惜咸以善人歸焉夫人劉氏晉之平陽人德柔嘉主內事殊嚴生三子長曰純克家有立志次日繹謹愿盡子道季天女一適裴氏子孫男一人未名既卒哭嗣子純來求表其墓道予私念其故昔孔子遇舊館人之喪脫驂馬以賻曰吾惡夫涕之無從也君與予西道之主人也從游讌語恂恂然蓋三年於茲殆非過客之有頃其可辭不敏君生長秦晉出身

軍旅間而禮度雍雍不知其為將家子與人交信而誠人無有間言在其諸弟間棗華輝蔭惟恐弗及又出天稟粹然也嗚呼以君之德之壽較之有不相稱及者仍哀之以詞銘曰

蒼茫兩間生也條寓一氣之來命有定數彼修短予奪理則有之若不繫夫積習善惡之故嗚呼謝君一債而去孝友淑善曾終始渝素天之報施如此豈定者不可奪來者固所予也將子孫延昌以永其終譽邪吁

故將仕郎汲縣尹韓府君墓表

府君姓韓氏諱澍字巨川其先陳留酸棗人世以儒業  
顯遠祖有方官至大司空六代祖璿累階銀青榮祿大  
夫五季間北渡河遂占籍為衛人榮祿生朝奉大夫祇  
德朝奉生八十一秀才奕山山生渤亦舉進士渤生柅  
善居室遂用富饒於君為曾祖祖悅有淳德不耀父仲  
字仲寬所居以善行稱君自穉齒性沈潛寡言笑羣兒  
劇里中過不少睨宗黨異焉少長以刀筆起家用言者

為安陽吏主椽以能入為府屬吏丙辰歲朝廷以相之  
五縣封太弟為采邑繼郡帥例肆覲君毅然以民計從行  
及敷對稱旨闕戶曹孔目官明年春降璽書起

聘君太原高公為彰德路總管遂汰冗員擢羣能新舊  
圖至設府史不數人君首以才選無幾轉案牘提控官  
夙夜在公勵精所事閱六歲克勤猶一日大為總尹所  
知授錄事參軍至元二年轉官制行積前後勞授以縣  
尹下車首以美俗邵農為務顧謂寮屬曰富足者禮義

之資耕桑者風化之本至于飭亭傳謹迎候奉上官徵  
目前之譽非吾所知也於是下教條課戶丁斲藁薄植  
桑果以敦大本非農隙不許入城市暇則行縣檢視勤  
惰而賞罰焉自是原隰昫昫榛莽為之開鄉隣有以忿  
閔訟于庭者君曰孝悌力田親仁善鄰古之善道初無  
大故何乃至爾諭而遣之至頑不率教則曰聽兩造明  
曲直是不難恐一置于罰終身玷辱為鄉里指誚吾惜  
汝者此也倘不吾念論如法比秩滿五事備舉所獲來

暮之歌厥聲載路矣五年用新銓法勅授將仕郎主高  
唐縣簿凡九月輿疾歸明年卒於絃歌里舍得年四十  
有八實至元庚午春二月一日也越十有九日從葬安  
陽縣西陵鄉武官原之新塋母李氏時年八十拊柩而  
哭之慟曰天乎遽奪我純孝至此酷乎聞者憫其賢孝  
縣君金相人進士秦公之孫配君德良稱生子男三長  
曰從益自憲臺六察史今為燕南河北道提刑按察司  
書史次從愿從草女明童適王氏子男孫四人後九年

戊寅冬十一月七日終祔安玄堂之左禮也初縣境夏  
大旱比致禱私念事之壅底獄之鬱滯亦沴氣所致乃  
裁決牢繫為一空及禱蒼山祠雩舞未收雲幢幢起中  
豁翼日雨盈尺繼謝祠下車還衆曰尹精誠若是當有  
回馬雨表公虔至半途果然尋隣道以蝗災告備已而  
竟不入境縣狀其異以聞是秋為有年君溫雅有沈量  
慮事遠善措畫臨岐暇裕略不動聲色亦未嘗矜喜以  
已長傲物其孝愛友悌出天秉粹然不忍一朝違母氏



側嘗行役逾時眷焉陟岵寢饋為不安於承顏孺慕若

此其至初見弟季既多枝葉蕃衍門戶事繁重故挺身

吏案盡心所事匪厥躬是私期於庇本根寬父母抱者

幾三十年若府君者可謂克孝克恭念顯養志者矣某

祖妣韓是為君女叔

曰女叔者稱父之妹也出六帖

君之嗣從益次某

行為外弟一日跪而請曰先人棄養奄踰八年坎不及

誌有街未祛唯是表於墓左者又闕罪惡之大無可言


若銘則尚於兄焉有託某追惟祖妣平生之言得君行

為最詳因繫之以銘銘曰

於鑠韓氏世為儒之宗兮  
彰纓若綬揚歷位乎公公兮  
猗嗟裔孫掾習匪其躬兮  
黽從事養夫親之志兮庇我  
本根殆芻藘之義兮  
聖哲所稱吾今見其人兮  
於穆府君諒彼古之倫兮  
兩漢循吏鑄頑以成仁兮  
嗚呼令尹誠亦吏之循兮  
予銘撫實其敢過為文兮  
魂而有靈尚  
懽嘆之一呻兮

秋澗集卷六十

謹按卷五十九第一頁後七行博索瑪舊作八思麻今改  
卷六十第十二頁前六行努爾諾延舊作女兜那顏今改  
十三頁前六行穆呼哩舊作木花里今改



總校官進士臣胡榮

校對官學正臣卜維吉

謄錄監生臣劉本立

欽定四庫全書薈要

集部

秋澗集卷六十一至

三

詳校官助教臣謝登雋



欽定四庫全書薈要卷一萬六千二百十七

集部

秋澗集卷六十一

元 王惲 撰

碣

故善士龍山張君從禮字仲和先生之墓碣銘

并序



善士張君諱從禮字仲和順州龍山人大父德仁有耆  
行鄉人尊敬之稱義嘗任燕工技府總管既老君當襲  
職請於府曰親老需倚余志已定弟從順賢而克荷願

昇之竟以從順嗣仲和姿清介不隨俗上下嘗從澹泊

先生學詩甚自憙也事母教弟以孝友聞承顏讀書外

室屢空晏如也君既不樂仕進嘗曰菽水盡歡不害養

志三釜五鼎非所願也至備筆以供朝夕平生友非逾

已者不交曰吾將安做施非當受不取曰惠將曷勝弟

從順洎婦併歿孤姪敏方三歲為鞠育成入過於已出

至贅子智於友生羊舌氏家仍為敏納室是亦人難能

也詹事張侯高其孝義憐其窮獨出楮幣數千緡付之



約得子錢悉助君養親以義重德薄謝弗敢當郡國知其賢以孝廉累辟亦不就臺憲廉得其實旌焉復之終身君悚然嘆曰人子奉親理固當然因而有獎邦之教也顧從禮何足以為勸其急上明分有如是者所居曲水里有事告植花闕

挺儼若侍溫清假日我其

間有問者闕

事子姑去自號栢溪主人左

山商公闕

得贊之闕 京師之明年君

來謁闕

見眉間今雖已矣

尚能闕

以孝止善者也至元癸巳

春母氏棄養以哀毀致疾是年冬十月三日考終牖下  
得年五十有六配劉氏亦能安君貧窶早世生子智及  
二女適裴氏王氏再娶董亦前君歿生子魯葬瓊州密  
雲鄉之王冢原友人劉某重契義介嗣子智中表其墓  
以君篤行有類古人者為之銘銘曰

堪輿兩間子職不易孝為化原融而友悌君於二者行  
不少匱濟以廉貞大錫厥類目為善士吾言匪比其善

伊何可欲之謂況乎質美而學行方而義繫匹夫而化鄉人曾克施之弗異五十六年為樂也洩洩去水來山密雲之隰隱然斧封山塚屹立是惟吾曾張仲之室過者必式

後漢張霸性孝讓舉動合理鄉人號張曾子

故雲中高君墓碣銘并序

君諱祐字仲和其先雲中人高祖已來遠昭穆無可詳者伯父與考金季家撫州以財雄邊伯父德真字伯諒潛德不仕考諱德榮伯寬其字也姿醇厚鄉黨以德人

稱嘗以勞權豐利酒伯母暨君之妣皆張氏女以如娣

而列妯娌伯生子曰信字仲禮曰義字仲仁信美丰儀

虎睛豐頤求珠赴海以樂終君實仲之嗣貌敦龐性孝

悌及長雖混迹闒闐衆不敢以尋常期初燕雲失守豐

利府君辟地南還汴梁壬辰歲例北徙以實衛墟君與

兄信素負心計相與謀曰衛居天中實通都劇邑百物

夥繁合散於此若以什一與時馳逐可致屋潤遂主貨

殖為業君為人篤信明敏不底蘊留既易彼取收息且

廉故聲實四出商販輿集其門貨既饒足不忍顯利自  
濡以東多鹽寡為得每每貸子錢有不克償及羣居郎  
舍積儻直而負者審其窘悉折券無難色由是三郎以  
長者稱於中外至元十九年五月四日以疾終於家壽  
六十有五三日葬汲縣汲城鄉南王里之原從新遷也  
配張氏與君德良稱生四子長曰明福以通幹由泰鹽  
管勾任河南府交鈔庫使次世英世顯世昌孫二人曰  
蔓曰莘姪三人曰夢得鄉貢儒士前君卒曰世傑世寧

姪孫二曰草曰華重孫一曰復亨明年明福以墓碣來

請銘余以同里巷者五十年知高氏為最詳即其富潤  
齒息而論蓋自高曾而降凡六世雖薦更世故以孝義  
勤儉同居不析故也至君承父兄餘業益光大於後內  
則齊理嚴肅以身率先族屬家僮十有餘指無間言日  
趨事惟謹屋廬被服務從樸素嘗以驕靡為戒外則持  
心近厚與物無滯敬畏官府奔走輸辦未嘗少厭所患  
謀生之不勤何恤王事之時亟也自士子通閱後高氏

迄今為河朔名族之冠豈偶然哉故遠服賈者雖千萬里外念寬厚饒裕獨以高氏為讓矧高氏以義致利義重於生因貨致富富而不驕為子孫又能求銘以昭世德是又好禮而知本者也銘焉得辭銘曰

曰富壽五福先匪欲厚能畀全惟高氏起雲燕凡六世財雄邊自豐利始南遷編衛氓迹市鄆居家里無間言我屋豐利匪顛益寡乏貫子錢長者稱動河壘供厥賦日翩翩曾不憚生勉旃業攸久族嬋媯服而食恥華鮮

孝與義為周旋動不匱理固然繼之者當鑒焉行山秀  
淇水淵高氏裔與並傳

新鄉縣尹劉君去思碣銘

并序

衛之屬邑曰新中鄉其地距太行東麓桑土衍沃浸以  
清泉之潤民俗敷阜自昔號河朔望縣惟其物廣而訟  
囂路衝而務劇故治稱為難然渴餒而易飲食者民之  
心也得其人苟有以撫而安之將見民戴之如父母仰  
之如神明惟恐來之暮而去之遽也維至元凡六年南



宮劉君理由江淮漕幕來主縣治君姿幹敏有機警言相  
時處宜果於裁斷既視事思有以事集于上民便于下  
於是舉條章明約束均賦役却造請凡轡馭之急遽者  
馴而致之不務高遠率先以身為度縣當關陝驛程使  
駟傳致日相望於道吏民疲於供頓君量其輕重處之  
有方無名而求索者皆以理謝之吏乘間侵牟之弊日  
就斂息廨舍一縣具瞻陋不克治事非所以整暇也計  
材庀工易故而新增葺者十餘楹復起蕭相祠俾吏曹

不自鄙薄以信景慕邵公橋跨清水上歲久墊蓄兢於履危乘隙大捷硿鍤斧官柳為梁公之舊締既高而固役不知勞而民免病涉至治道塗取通快堙汙夷峻徒行輦致坦不少阻歲時邵農裹糧自隨周行田里未嘗追呼俾妨時作耕稼蠶績檢括課視切于己私復諭之以勤儉申之以孝悌使遷善而遠罪由是邑里感念屏以作勞生理且滋殖矣下迨鰥寡顛連亦行得所流逋聞之稍稍復業故賦稅輸納不及期而辦詞訟繫囂不

俟約而簡君以令行民信教烏可後乃出已稍崇飭廟  
學如蓋瓦級磚之破壞者丹堊漶漫之不鮮者一完而  
與之復葺黼座陶祭器周繚崇垣外障儀閤春秋釋菜  
禮容為增肅暇則禮師儒率僚吏暨邑之子弟聽其講  
說使知所務故三載間庭無留訟牢戶為屢空至隣有  
疑讞滯而未決者上官倚之不蔽而縣之治否為可知  
君既更耆舊苗仲牛古麟慕賓羅從玉郭昌祚席安等  
懷其夙愛有思罔置者來謁文以垂示于後辭再四不

克仍覽觀件狀而次第之且寓夫余之所感焉嘗觀兩漢循吏政顓風化子視生民訓牖惠養如恐不及凜然有三代遺風惟其決洽於民者深至故所居卽化所去見思有起祠樹碑以表夫永載道賢之意非幸也宜也迨叔世司牧者昧於治體苟簡貪墨習為當然其可見者不過曉簿書以為能飾矯偽以干譽其於民之休戚漠然如秦人視越人之肥瘠甚者因之以急張臨之以形勢剥民之肌以膏其身傾民之產以肥其室使民畏

之甚豺虎惡之劇寇讎告訐謗讟無所不至以理勢論之亦宜也今劉君以勤強幹敏力矯時弊致績用章著吏民稱道如是可謂能也已 是宜銘銘曰

天下之事孰覈孰綜政發于上相臣是控事終于下疇致厥用相須成務匪令奚共雖百里間務實繁闕有社有民有賦有貢兵之貧難民之疾痛期會簿書風俗獄訟我剖我決我承我奉粵惟良能治之有統千室鳴絃五袴流頌以致朝堂令無大愆庶事日康四方風動增

秩賜金璽書褒諷緊爾責望得人為重暨暨劉尹事功  
自熹挺身頽流卓爾為治不務高遠不涉苛細相時致  
宜因利而利瘼自我蠲聲由實致所以懷思去而罔替  
截鐙願留非愚敢覬胡若稱述垂聲來世刻石縣門永  
照鄙衛

故太一二代度師先考韓君墓碣銘

并序

君諱矩字某其先為大梁望族曾祖塙五季時官司諫  
以銀青榮祿大夫致仕避地北渡遂占籍為衛人祖奕

大觀末舉茂才數為縣有聲父渤金初登進士第有文  
采終獲嘉令君自少以疾不仕姿慈祥家故饒財心樂  
施與凡親舊貧窶里喪有不克襄事者至傾刮橐篋以  
贖其急或者來謝曰非初心也鄉黨以長者稱天眷間  
太一始祖真人以神道設教遠近嚮風受錄為門人者  
歲無慮千數君舉族清修信禮為尤至香火之奉雖寒  
暑風雨不爽厥德已而君內子閻以嗣事為禱真人篆  
丹符令吞之且曰汝家積善久當產異人既誕師果有

奇表真人目之曰他日輔興吾教者此兒也自免抱即  
留養道宮三歲識字七歲善書既長儀觀秀偉慧悟絕  
人批答辭章捷若影響由清虛師主盟法席二十餘年  
輔興之言有充而至於極者今追定仙號曰太一二代  
嗣教重明真人由是而觀韓氏一門之積其來固遠以  
有是子而論之君之德槩可見矣雖年甫中壽師易韓  
為蕭至於克荷玄綱光隆教本在韓宗亦為不朽君既  
歿重明躬葬君於四門里祖塋之次母閻氏祔焉禮也



六代度師全祐顧惟傳嗣之重猥及余末千何以圖報  
維是師真所從出者其潛德幽光表而銘之中心庶獲  
少安乃以刻文來請師於某祖妣妙清君列叔父行義  
不可辭遂叙其世次而系之以銘銘曰

作善降祥長惡得厲在理必然隨感而至赫赫韓宗德  
顯河衛衍慶及君瀋而瀋淪俟著而發乃生異人異人  
伊何太一次祖提挈元綱鵬騫鳳翥比及本宗光隆丘  
土松栢蕭園連岡接武神格仙遊有來容與風駕雲軒

同翻共馭純化追遠歸厚來昆沂流尋源以表道根勒  
銘墓石永賁四門

太一三代度師先考王君墓表

君姓王氏諱守謙字受益博之堂邑人世以播種為業  
致資產豐阜田以井而計者九桑以株而會者蓋萬數  
焉遂為里中鉅家然闔門善良薄於世味奉道之心亟  
若饑渴聞太一教以符籙濟度世厄所在奔走惟恐其  
後君乃與其配李氏欽挹真風願為門弟子量家歲費

外悉以贏餘為本宮香火供有子曰志冲即今太一三代度師也師生而岐嶷七歲出就外傳應對進退皆中禮度及毀齒善記誦喜讀老莊等書初君董田務於野牛憇蔭下寤寐間若聞呵唱聲見數青衣人導一童子前來且曰天仙過此可少避恍視之無有適師持壺漿來饑君異而不出曰自度是兒恐終非田舍中物也及長父兄與議婚不許曰去家入道乃所願也遂禮二代師為黃冠以經明行脩得度入道士列既嗣法席遭遇

道陵特賜號玄通大師君聞而喜曰天仙之異誠有驗矣且曰平生奉道獲此實報王氏為有後矣享年七十有六考終牖下師以禮葬本縣王莊里祖塋之右母李氏祔焉今度師勅定仙號曰體道虛寂真人其師真之德靈應之蹟詳見墓碑茲不復云六代度師全祐嗣教之七年自燕命提點張居禮等以禮幣來謁且致其意曰道家者流雖崇尚玄默而太一教法專以篤人倫翊世教為本至於聚廬託處似踈而親師弟之在兩間傳

度授受實有父子之義焉今三代師真其在宗門表墓  
有碑嗣法有傳可謂光且顯矣然物之在天壤間未有  
無本而出者今未有餘榮而本為寂然豈厚人倫輔世  
教之理哉敢百拜以表辭為屬幸憲使無拒予以師之  
言誠為知所本矣遂諾而作之表

故真靖大師衛輝路道教提點張公墓碣銘

并序

道有紀綱需人而後弘如上承師真下綜法務以公材

吏用而開玄佐之功者其鍊師張公乎公諱善淵字幾道趙郡平棘人生有異相比長言灑灑有序父溥嘗任衛真縣酒坊使時太一四代祖中和真人提點毫之太清宮溥素挹真風日侍師於几席間沾沾然而喜曰吾兒和聽以說遂參禮為門弟子中和人品高邁道價重一世與游者公卿賢士夫一動靜語默皆中倫慮公親灸既久日有所得與之俱化若時雨然歲壬辰河南大兵公與中和隔離者久之既而聞師北渡稅駕於趙迴

奔奉焉師忻甚曰奔走疏附吾宗門有人矣即令知太  
清觀事丙午夏四月侍中和赴太后幄殿及見亦霑寵  
眷奏受真定路教門提點仍賜白錦法服命副中和頒  
錦幡寶香於嵩高太華二山以祈福祐時衛之祖觀兵  
燼後鞠為草棘中和昇公經理不三數年神庭燕處頓  
還舊觀壬子夏六月公從中和北覲嶺邸加號真靖大  
師改提點衛輝道教事甲寅歲復奉旨致禮嶽瀆歲癸  
丑冬詔天下名師赴燕長春宮修羅天清醮公奏五代

貞常真人與會其所以致顯宗教推轂儒師高出衆表  
俾道流光闡公力居多己未春上南巡臨幸壽宮時公  
以疾不克朝謁上言念舊眷命近侍存問仍賜御藥葡  
萄酒服之病良已故中統二年換受宣詞有云操持堅  
正祭醮精嚴隨師遠覲於闕庭奉命敬祠於嶽瀆已加  
玄號宜煥新章之旨道論為榮焉公資清峭貞幹臨事  
敏而善斷馭衆肅而有方雖一言話出人意表不肯碌  
碌混常流中生平喜讀書於老子最有得故行已接物



多掇其微妙至於禱禳醮祭內嚴外辨綽有餘裕兩從  
中和北上沈幾先物往返萬里無不如志嘗奉旨給諸  
道度牒鶴馭所經例有贖公略無私焉其清介遠大又  
如此壽七十委蛻於太一順事齋室實至元乙亥正月  
廿五日也越三日陪葬祖塋之次後八年六代祖純一  
真人念公有力宗門在玄士為傑出有不當混於後者  
丐予銘之以識墓竈因據其實行而系之以辭銘曰

真靖受業始於中和荆璞雖美器成琢磨東瀛北渡載

造玄科用匪其人道將若何公綜玄務辦於益多龍庭  
再造萬里周旋竹宮咸秩羽服雲闈尊師顯教我力孔  
宣玄綱張施委曲而全道價軒輕濟之以權千塵而下  
歎其才賢仙游有限道館驚捐斲石紀行以大斯傳雖  
高深兮易位尚知為玄門之玄

提點彰德路道教事寂然子霍君道行碑銘并序

國朝甲辰乙巳間鹿庵先生教授共城不肖亦忝侍几  
杖有為全真學者重玄李鍊師自相下來買田於卓泉

立棲真別館既而重立北歸委紀綱士霍君明道為之  
營建不數年剏堂殿廊廡煥然一新際泉兩涘盡植巨  
竹陰翳數百畝中構筠溪亭招致吾徒徜徉笑傲其上  
由是卓泉道院聞於遠邇適名洞天福地之末維重立  
則始之勤而霍君明道實有力焉師諱志真號寂然子  
明道其字也系出安陽縣秋口農里大家父諱澤嘗夢  
一麻衣道士云自天壇來求託宿許焉寤而誕師幼不  
好弄寡言笑既長性澹泊不樂榮利弱冠辭親學道父

憶夙徵即允其請迺詣相之天慶宮禮重玄子為門人  
全真家禁睡眠謂之消陰魔服勤苦而日打塵勞以折  
其強梗驕吝之氣師從事於此者閱三十寒暑略無憚  
色重玄驗其為受道器命主治玄門事挺志誠確措畫  
井井有法及卜築蘇門委之輔敦教基弘演宗緒俾持  
達而有所樹立焉師披荆榛掇瓦礫攻苦食淡擴充師  
志復闢農畝創水磴廣資生理培植教本致遠邇尊禮  
樂者日衆至於齋廬深靜井竈修潔遊人過客如歸而

仰給焉。道俗推舉任輝之威儀師，滌除玄覽，痛自澄治。務正己以格物，有辨訟者率用理遣，不知官府為何事。羽流敬安一方，凝重至二十載之久，年踰耳順，相之吏民宿仰道價，請主天慶宮。既至，授提點彰德路道教事。凡十有三祀，年尊德重，不俟言論而衆自化服。以某年月日沐浴易衣冠，無疾而逝，壽八十有一。葬安陽縣王裕里重玄仙塚之側。師丰度清逸，若山澤之矍，外樸而內敏，質直而尚義，簡重自居，處事得時，措之宜，和同光。

塵接物無徇俗之弊其訓導徒輩言約理到以身為律  
度可謂純乎其純玄之又玄者也門人杜志用夙承提  
誨圖報無方琢石紀銘期傳不朽乃介太一純一真人  
李公來屬筆予既重李請又與師有夙昔之雅既叙其  
行已而系之以辭銘曰

道之大原玄文五千誕誇索隱匪其正傳質稟貞素心  
地善淵惟畀也全內思靜專耕田鑿井順乎世緣修已  
求志繕吾性天無欲觀妙是為道之自然尚無往而不

可孰間朝市之興林泉若人者雖乘化而委蛻安知其  
精純之氣不乘冷風而仙耶門人攀慕向雲翩躚勒銘  
松臺何千百年

凝寂大師衛輝路道教都提點張公墓碣銘序并  
師諱居祐字天錫世為汲郡人父道用居樂善東北坊  
以茗飲為業師早失怙恃兄居仁訓育有方甫長愿立  
如成人然向慕玄風亟若飢渴思得大宗師依歸以果  
其腹歲壬辰天兵下河南時太一四代度師自拓城北

渡應大將薩竒蘓請主新衛昭順聖后祠居仁舉家崇奉遂命師為門弟子居無何度師北遷居趙之太清宮以師童侍有年謹敬不怠念焉遂度為道士俄命掌觀之廩料出納詳明儉而中禮曾無撮龠之悞度師稱其能時衛之祖觀兵後燬廢掃地度師遣提點張善淵詣衛興復且請師以佐葺理允焉師為戮力從事小大之役率以身先之既而張侍鶴馭北覲營建事師獨任之不十稔壇殿齋室下暨庖福庫廡井井一新已酉春中



和真人還衛顧視喜其得人己酉冬中和昇寂師辨易

葬事焦勞為多丁巳冬以事召赴行殿勞歸霑衣幣有加還貞常真人以師貞幹有節命知宮事繼陞充提舉中統三年上遣使植碑壽宮師復趣辦不踰其素於國事有光至元十八年六代純一真人嗣主法席以師道行純粹勤恪有功言于朝宣授凝寂大師衛輝路道教都提點七年間道流推服教門增重焉廿六年二月五日得寒疾再宿談笑而逝及歛予臨視面如生吁亦異

哉享年七十有二越七日提點范全定等葬師於四門里祖塋之側禮也師為人樂易無機械苟有過須問之人而無憚於改不然咽若有物所梗其歷事三師前後五十餘載護道服勤始卒德不爽純一真人以予鄉曲故持狀來謁銘因憶十九年冬予寓大都道官適師與會宵永無寐龕燈爐火尊俎談舊嘗及萬靈坑事悲世故之無常悼逝者之如是淒然動華表歸語之感故師每歲例清明后一日丐斂酒肴楮幣等物斗量車載展

祭塚次以慰鄉梓冥漠之魂惟恐其心之不盡也其於  
存歿兩間亦追遠歸厚之意也歟是可銘銘曰

太一設教幽顯兩通凡曰云為須人乃崇猗歟張公德  
度冲融致身福地逢教之隆敦兮若樸發之天衷寂不  
俗絕勞而有功師事三葉罔異始終一朝委蛻為報何  
豐祖塋之東萬栢葱蘢陪葬其間若堂有封鏡銘表石  
永示無窮

故卓行劉先生墓表

先生諱德淵字道濟襄國中丘人性癖直有操守好學能自刻厲及游淳南王先生門思索辨惑等說自是饜飶史學為專門之業古心古貌非禮義不妄言動一介不取於人朋友死雖千里遠徒步必至覩前賢竒蹟偉行擊節嘆賞而不能自已至椎耕牛以饗賓賓王殺乘馬而祭昭烈其或憫時之艱急人之難切於己私而不置也始則人大以為異既而疑焉終迺歎服曰先生篤行直躬守死善道者也北渡後赴戍戍試魁河北西路逮

中統建元三府辟其行能授翰林待制晚節知圓鑿方  
枘不能與時阿匱乃以所得成就學者立言傳後著三  
為書數萬言其說為天地立極為生民立本為聖賢立  
法敷析溫公通鑑數百條扶翊章武俾承正統及見考  
亭綱目書多所脗合沾沾而喜曰吾天地間可謂不孤  
矣又通古文奇字士多傳習之凡經指授者雖節目礫  
砢表表有所立或惜其獨善不顯諸用然振衰善俗激  
厲後人多矣太保劉公左轄張公以鄉曲義來周卹皆

却之曰予非踽踽涼涼閹然媚於世者也至有以禮願  
交而弗之允者許魯齋每道邢必式閭致恭而去壬子  
秋不肖始覲先生於胙對榻學館夜參半歛起撼予曰  
吾於漢丞相亮論議際有所得惜不並時當有說云云  
至元壬午予按部夷儀謁先生於天貺齋棲遲蓬華心  
融一天自樂其樂英發之氣至老不衰詢先生近何述曰  
適作四凶辨天府七星挽章予以張皇幽渺振濯漢靈  
一何壯也臨訣握予手曰吾耄矣斯文未喪子其自將

行有以異之既而聞卧疾慮失調養詢諸友生始知先生有子樸早世女孫一適康氏子新婦女孫皆不聽侍疾卒年七秩有八時至元丙戌九月廿二日也葬蓬山之西丘後十五年晚進王寧合鄉國議來請曰先生學貫三才養素丘園行媿於古人望高乎一世沒當易名用垂光範予謂寧曰士風之不振也久矣道義之斲喪也微矣安得高風苦節如先生者哉昔孟東野以詩鳴唐張籍私謚曰貞曜程伯淳以道自任潞公揭之曰明

道今扳二例如以卓行加之則名與行為顯允矣門生  
民部尚書戎益將礮石表墓以圖不朽大德三年龍集  
己亥仲冬吉日翰林學士中奉大夫知制誥同修國史秋  
澗王暉為之表

秋澗集卷六十一



欽定四庫全書薈要卷一萬六千二百十八集部

秋澗集卷六十二

元 王惲 撰

文

詛蠹魚文 并序

王子曝書于庭風動帙開有蠹數十輩倘佯其間取書眎之甚有嚙壞者遂為文以詛之亦且攄予懷之梗槩云其辭曰

嗟彼上蒼之生物兮曾巨靈蠢細之不遺隨一物而

一名兮莫不各有其所施神龍驤首而霧集兮鷲鳥  
搏擊而翰飛蜴緣隙而射蝎兮蚓含淒而應時玄蟻  
結陣而雨至兮蜘蛛縈絲而喜隨至於蛇虺毒而虎  
豹猛兮網繩搨及人得驅而遠之彼蠹魚之何為兮  
自當去之而不疑我固拙而未貧兮尚其書之滿家  
上規姚姒而法周孔兮浩波瀾之無涯念披讀而有  
次兮譬草木之品差歲翻閱而粹莫週兮蠹魚乘隙  
而遺蘖芽感餘浥而化育兮何族類之紛拏正如深

山大澤人迹所不至兮足魍魎而生龍蛇爾名為魚厥  
號曰蠹無鱗鬣以自衛不潛淵而躍渚披景慕之虛名  
蘊蠶食之邪慮天壤之間充汝腹者多矣尋茫茫之墜  
緒幸不為人之害兮唯簡編之見惡信黃卷之有味汝  
得幽潛而饜飫艷輕碧之微軀兮曳白鬚而容與曾賢  
愚之無間兮輒遇之而必妬誰謂汝無牙兮何以穿予  
之竹素紛篆籀之紆屈兮致篇章之脫誤啟散帙而撲  
滅兮念忌器之善喻米春薺之纖葉兮雜芸芳而細注

恐物感之有驗兮庶噍類之一去曾少力之不獲兮愈  
滋蕃而無數汝豈學道之人兮咀糟粕而未悟將生死  
於文字之間兮凝精思於朝暮不然秦李斯之徒兮師  
六經而依據一旦燔之而叛道兮俾黔首而聾瞽流餘  
孽而見化兮終宇宙而惡著聖防謹其萌芽兮堅氷凝  
於霜屨苟不處而不區兮恐齧缺而無餘也布我床榻  
汎我庭宇亂牙籤於風中趨秋陽之烈馭既不能同湯  
鼠之磔裂兮以災暉而為治其籍流爍之熾燼兮書難

為之一杼燔醜類而莫逃兮遞糜竭於諸部失餘泄之  
所在兮歛炎光於書戶齊潔竹書之簡森列周宣之鼓  
固我扃鐫若有神護喜卷舒而無恙殆遺亡而見補既  
收書而入室遂慨然而懷古彼微蟲之蠹書尚為害而  
斯巨吁姦邪之在朝妬忠直於時主其擯斥危亡之禍  
將何如哉嗚呼噫嘻我得之矣噐噐管蔡為周公之蠹  
兮幾謗成於王所眊眊子西為宣父之蠹兮化不需於  
荆楚滅倉媒孽為子輿之蠹兮道不行於東魯上官媚

嫉為屈平之靈兮賦懷沙於汨浦匹夫絳灌為賈生之  
 靈兮老長沙之一傳孫弘變詐為仲舒之靈兮策不施  
 於漢武恭顯讒慝為蕭傅之靈兮致災運之中阻封論  
 小人為鄭公之靈兮太宗幾以刑而為務盧杞姦邪為  
 真卿之靈兮卒縻軀於賊虎逢吉陰險為裴度之靈兮  
 播緋衣之訛語靈兮去之而不可疑兮尚拔山之固兮  
 況任遇寵信返為忠直之輔兮奮筆成文吾為此而懼

兮

祭諸葛丞相乞靈文

維大元至元八年歲次辛未九月壬戌朔某日承事郎  
前監察御史衛人王某敢昭告于漢大丞相忠武侯諸  
葛公之靈嗚呼事有曠百世而相感者以道義故也維  
公挺天人之資奮雲雷而起黜功利之邪說明剛健之  
正體攘伏羣陰嗣興漢紀兩立偏安幽燭厥理茲少康  
克復之本心何戰國縱橫之可擬由是而觀公之志何  
意於鼎足而峙也至於開誠心布公道從權制示儀軌

牧民訓兵賞善黜戾以君臣大義而言乃忠武開濟之  
餘事也宜魏人畏之而如虎走狐狸而號魍魎偃回旆  
之威靈嘆竒才於壁壘故三代而下巍然王者之佐惟  
公一人而已繫一介之凡庸何清光之可企然揚洪蜀  
郡之功曹楊顥幕府之屬吏躡一言而表擢感忠規而  
隕涕又如李平廖立以過見廢俾之怨艾固匪遐棄及  
夫蜀婦既髻痛吾已矣恨終左衽發憤而斃是又見公  
不屑與新之教采葑采菲之意無以下體而為累也若



憚也質朽才疎有志未遂年迫知命動昧操履蹒跚仕  
途幾年于此八月行臺僅免官謗三年御史莫吐其氣  
今則俟大治之甄陶聽鼠肝而蟲臂雖耿耿以自信復  
何為而何逝恐生無益於人死罔聞於世也用是中夜  
慨歎不遑寤寐乞靈祠下陳絲而跪我公在天日星昭  
緯容光必照奚間彼此思蛻濯其塵穢扣囊底之餘智  
覬增益其不能為砭針其頑鄙付清明於眇躬極臣子  
之所止有來厥脩神所惠祉庶免夫年與時馳意從歲

易悲歎窮廬遂成枯萎逼逼之懷竟無及於追悔也尚  
享

為虎害移澤州山靈文

大元國至元十二年九月日承直郎平陽路總管府判  
官王惲近被藩府檄伐石東鄙有以虎害言者謹移文  
以告澤為州當太行心腹間傍雖長林巨壑獸蹄所交  
窟宅所在然鳥獸陰類神實主司陰禦默捍限隔常處  
制其暴厲使無犯越以為人害此神之職守吏之責也

今不逞之獸捍然不安其所安食其所不當食怖農耕  
梗行路啖民畜膏肥厥身以孳乳其遺類亂區制之常  
經忽天府之命吏是將與吏民雜處此土方今聖賢在  
上世道清夷政令簡肅年穀登盜賊弭守吏者承流宣  
化牧養斯民為任坐視若此安能俛首降心偷安朝夕  
容此物橫重念民之於國備犧牲粢盛供天地百神之  
祀出兵賦芻餉佐軍旅征伐之用重繁若此幽明兩間  
敢不敬忌以顧卹邦本且民又未嘗輒犯於彼彼何為

而然哉若曰妖孽之來蓋有由然祗吏之不德政有不善自有任其責者奈何禍延平民使居者行者惴惴焉懷旦夕不安之恐一至於此哉即欲窮幽致討勦絕而後已逮禽獮草薙等耳然神不於其告輒從事於彼是守吏不有其神此文告所以先也維神聰明正直念守吏克虔之告思職分當然之理赫靈威迅符牒搜索克渠斃諸原野餘則鞭笞驅逐遠放林壑限以常處永絕斯害使一方安靖遂田里有生之樂雖神之職也實神

之惠也惟明靈其圖之

瘞畜犬文有銘

犬之於人有功矣晝則守禦夜則警盜其健則能搏物  
猛則能取威窮則不遺其主靈則不失其家茲犬德之  
大率也予有畜犬曰蒼頭髯獠被體耽耽然有獅猛之  
姿誠猥聖之上品也其為德則不貪饒不舐穢不虛吠  
不狂遊寢有常處履擇其地投之物非啖之不敢嚙叱  
之退非招之不敢前至於親屬賓客一及於門牆者聆

其聲亦能識其人指揮馴狎咸會人意可謂有人性而無狸德矣嗚呼物之生稗而壯壯而老老而病病而死順常理也主人何憾焉且計其歸於我以至於死蓋十有一年于茲其服勤守禦功亦多矣主人惻然而興命童子具畚鍤裹以寢簣枕用玄石瘞於古堞之下亦敝蓋不棄毋使首陷之義也記曰捕田鼠者祀之矧犬有功於人也昭昭矣故係之銘其辭曰

嗟嗟竒獗猥望之種曰守曰禦或靜或動靡失其常風

鳴意聳卧護我家取威于衆相非狸德爾馴且勇唯有  
稱德與良馬共生也服勤死當禮送敝蓋之義敢不是  
奉

諭平陽路官吏文

為判官初任時作  
時九年五月也

契勘國家張官置吏本以為民且縣而州州而府吏而  
官官而長雖上下分殊大小職異以承宣而言實為一體  
至若親臨民事周知下情如賦稅課程婚姻良賤債負  
田宅刑名等事推明根源分別曲直兩盡物情一歸於

正為莫若州縣耳故諺有之既為民父母當作子孫者此言雖微可以喻大恐不當憚其煩勞一委于吏致開塞倖門情生詐起附會科條高下其手富强恃勢者理本曲而返伸貧弱冤抑者情久鬱而罔訴事體既乖勢成稽滯及愬者有辭莫可推延仍作疑似上之於州州司設有窺避事情捨難趨易艱於勞心者止憑縣解畧不詳審輒上於府者有之易而有謂者一委胥吏聽其飾說亂行剖決者有之謂如按驗未完情辭稍備或明



具條章不行定擬冒亂上陳倖其萬一者有之又念徇情同列者視違錯而不言既滿望代者以患失而為慮至於辭不清明而曰民囂於訟身不力行而曰事擁于下以職以分何不思之深也總府固當持大綱畧苛細不宜求痕洗垢以察為明然念軍國之利害刑罰之枉濫脫或差悞而總府亦不敢止守大綱究其所以自有任其責者矣至若總司行有不逮虧一道之紀綱亦何以逃朝廷共理之責乎又念郎官上應列宿苟非其人百

里受害靜言思之可不畏歟稔聞公等類皆明直恪勤  
官政小則寄百里之命大則近連率之職天官天祿實  
荷恩榮獨有履正奉公竭盡心力以功名圖報上可以  
答國家委寄之恩下可以塞為民父母之望噫社稷人  
民莫非王事視如私家無不修理推廣此意又何俟告  
辭之丁寧公移之督責也自今以往計能強其所當行  
勉其所未盡以一體為心共理為務遠懲積習作新斯  
民使一道元元霑被王澤而遂有生之樂實公等之力

總府敢叨其功乎所以集衆思廣衆益者惟期王事有成則總府亦庶乎其寡過矣

敦諭百姓文

汝等性秉五常智周品物聞善必遷知過速改此汝固有之理恒久保身之道也方今明教化勸農桑彰善癉惡為務庶爾有衆比屋安然遂有生之樂此明天子之意也平陽陶唐故都詩書遺俗世不乏德比者自遠思之化陵夷衰晉之風尚氣亢強頗乖正理致使訟牒囂

繁動經歲月較其所爭至甚微眇親舊變為仇讎畎畝  
棄而荒穢事端既起歲計一空亟當戒者乘氣室塞不  
度輕重果於自殘禍延後人嗚呼一忿輕生乃至於此  
非愚而何況朝廷委付守臣之責非特有司常常而已  
正以承流宣化美厚風俗安靖一方為重兄兄弟弟夫  
夫婦婦恩義至篤也不可因細故而致爭比鄰共里連  
鄉並黨緩急相恤也不可以小忿而興謗蓋好鬪者喪  
身之原健訟者破家之本興言及此我心悲傷汝也何

心忍於為此常念禮讓者安順和睦之方孝悌者福澤  
富厚之本一日自新終身樂地能爾何止公庭致束杖  
之清田里獲共安之樂將見祖先神靈安於上子孫德  
澤流於下比屋雍熙永為善俗豈不快哉豈不樂哉據  
教諭社長耆舊人等請以此意敦諭中外使咸知勸戒  
毋重其改作也其有不待教率自來孝悌勤儉力田而  
省事循理而畏法者申明上司別加顯異若克頑如前  
恬不知省上違守府之訓辭下悖父兄之忠告是亂常

敗俗之人國有常刑悔將何及至於有司非橫以侵牟  
豪強兼并而為事科差不均力役偏重縱而不問以致  
失宜使汝下情鬱抑控告無所是總司撫字無方得罪  
於汝將何以息閭里愁嘆之聲朝廷共理之責乎汝等  
其詳思毋忽

勸農文

竊惟民生之本在農農之本在田衣之本在蠶蠶之本  
在桑耕犁把種之本在牛耘鋤收穫之本在人人之本在

勤勤之本在於盡地利人事之勤地利之盡一本於官  
吏之勸課夫田功既盡縱懼水旱尚有所得仰事俯畜  
迺克匡生穡事不勤雖植農桑終無所穰賦稅饑寒  
將何以濟由是而觀克勤者身之寶自惰者家之殃此  
勸課所云急也提刑按察司欽奉聖旨所在勸課農桑  
使職近緣巡歷考照簿書其耕播栽植之事勤惰勸率  
之方大抵虛文多失實效勸農之官長民之吏安得  
不任其責况今春首農事方作巡行勸勉適在茲時仰

所在有司照依已降條畫徧歷鄉村奉宣聖天子德意  
敦諭社長耆老人等隨事推行因利而利察其勤惰而  
懲勸之所有事條開列如後

一 如田多荒蕪者立限墾闢以廣種蒔其有年深瘠薄  
者教之土糞使土肉肥厚以助生氣自然根本壯實雖  
遇水旱終有收成若無閑田此最良法

一 穀麥美種苟不成熟不如種稗切須勤鋤功到去草  
培根豈不聞鋤頭有雨可耐旱乾結穗既繁米粒又復



精壯此必然之理也

一二麥可敵三秋尤當致力以盡地宜如夏翻之田勝於秋耕概糶之方數多為上既是土壤深熟自然苗實結秀比之功少者收穫自倍

一所在水利常令修葺毋得因循廢棄倘遇旱乾獨沾豐潤是地利偏患一方人力可不加謹又兼此係朝廷最重之事切當用意仰體至懷

一桑麻之務衣服所資多方栽種趁時科孳自然氣脉

全盛葉厚稽長飼蠶績縷皆得其用又栽桑之法務要坑坎深濶蓋桑根柔弱不能入堅又不宜拳曲難舒根既易行三年之後便可採摘

一蠶利最博養育實難如浴連生蟻初飼成眠以至上簇必須遵依蠶書一切如法可收倍利嘗聞山東農家因之致富者皆自絲蠶旬月之勞可不勉勵

一耕犁之功全藉牛畜須管多存菑豆牧飼得所不致羸弱以盡耕作其或引重服勞使長有餘力若有羸老

不堪者切須戒殺勿擅行屠宰

一雞豚鵝鴨之屬菜果瓠芋之類皆可養人務須繁畜  
廣種用之朝夕不為無補故古人有言菜不熟曰饑豈  
為細事

一時至物成罷亞隴畝更加併力收斂以防風雨損壞  
有失歲計不惟盡廢前功一飯到口自行暴棄良為可  
惜

一古人蓄積最為急務故國無九年之蓄國非其國也

如平陽太原兩路例有蓄積往往山下饑荒鮮聞山上失所近日官設義倉正為此也蓄積之事其可後哉

一織紵紡績責在女工可諭家長戒其慵惰嚴立程限造成端足以備粧着蓋非鳥獸必須溫煖可禦冬寒若無衣褐何以卒歲

一或有頑不率教惰農自安背本趨末敗壞淳風朋游羣飲稱日事情釀酒屠牲指為口願田務方集耽樂城市其或別生事端遭值官司父兄親戚理須營救豈止

破壞家產田產轉成荒廢此等切當禁治毋得輕犯  
一有孝悌力田為眾表率汝等舉明到官優加寬恤如  
有浮泛雜役可除者即為蠲免以勸餘人

據已上事條仰社長耆老人等各於當社時時開陳隨  
事推行因利而利察其勤惰而勸懲之不致因循苟且  
徒文具而已庶可以仰副朝廷愛養元元務農重穀之  
本意也除已暗行體察不如教者須議省諭各令通知

勸農詩

總勸

分司勸課不辭頻汝但聞言日克勤倘使有名無實效  
到頭俱是具虛文

糞田

年深時種薄田疇糞壤時加自昔留田果糞餘根本壯  
縱遭水旱亦豐收

種桑

年年勸汝盛栽桑相度田園土脉長屬汝一根如法種

明年要見百根長

勤鋤

鋤頭有雨潤非常此是田家耐旱方果使鋤頭功績到  
結多得米更精良

水利

細思水利最無窮普利灾傷獨歎豐豈倘有可興須舉似  
已成毋得廢前功

女工

田家門內事紛拏最緊蠶繅與績麻主戒婢奴姑勸婦  
趁年作活可成家

訟田

近年田產貴於金明見無憑持力爭縱使一時官錯向  
就中不值有神明

結親

成婚作贅結歡情往往年深致怨爭省訟有方渠記取  
姑須書契兩分明



讀書

孝慈和順草囂愚說似兒孫自讀書縱不盡為官宦去  
省心解事亦良圖

省訟

典田賣舍屬曹司何似無爭省狀詞唆汝致爭元是賊  
勸令和忍是良師

畏法

禁網寬疎固不苛慎毋輕犯被拘羅更思有理無錢語

試估家資有幾何

屠宰

上司禁汝莫屠牛間有人來告事由豈止到官刑罪慘  
怨讎相結幾時休

鬪毆

農家蠶務與耕田除却耕蠶半是閑利害不多休致鬪  
壞錢當罪片時間

教唆

教唆冤報似循環比及兒孫已被憊若欲人生求利遠  
正須良善養心田

盜賊

一毫非有莫萌心竊物穿窬罪不輕重是杖徒微刺記  
枉因纖芥壞平生

飲博

常思羣飲與攤錢此事尤須預禁闌酗至輕生輸到盡  
恁時雖悔恐應難

安分

貧須藉富富憐貧安分懲貪德自新積取饒糧防儉歲  
慎無相率去祈神

天報

四民惟士最純風天憫辛勤報已豐試看仕途青紫客  
大官多半是莊農

終勸

分司勸汝事多忱今歲詩篇意更深切把此詩長記誦

來年比勸預關心

又

文告裁成二十詩篇篇皆出老農辭汝歸相勸行毋怠  
便是分司樂不貲

祭文

先祖妣韓氏祭文

中統元年庚辰秋九月丙寅朔十有一日丙子男孫某  
等謹以清酌庶羞遣奠於祖妣韓氏之靈繫韓氏先昌

黎之裔枝分派析散處於衛衣冠煌煌文經武緯越宋  
有光司空之貴殫觀其譜本支十世猗嗟祖妣實出其  
系薰沐膏腴生大盛世德婉柔嘉主夫中饋貞祐初元  
金兵四潰萬室一存危若旒綴時維祖妣歸于王氏內  
助我祖畢力家事遂濟坤柔外扶貞義我堂復構我祀  
復繼內治雖嚴舒而脫脫我祖先歸我考時穉勤苦流  
寓栢舟自誓鞠養提攜遂成偉器名甲京師一日騰沸  
抱飴諸孫免夫火水至克負薪其恩非細欲報之德昊

天罔既八十之春不為早世顧予不孝榮養殊替有銜  
不祛涕泗面被庚申之秋應辟東魯募辟幕官唯曾是  
主慮其不淑庶獲奔赴罔遂所求心不遑處后土皇天  
實聞斯語旬日之間事易其故天誘愚衷駕言西鶩拜  
省庭闈病為少愈九月初吉星河尚曙有物告終聲動  
軒戶奄奄在床彌留不去日薄西山矯首云暮風樹之  
悲有淚如注盤盤新阡實惟高原安之妥之一遵訓言  
傳家之範敬奉周旋左配我祖何千萬年嗚呼尚享

廣平郡夫人完顏氏祭文

徒單  
學壽

懿懿夫人金源之裔分派天潢坤柔所萃式承陰教婉  
其令容作配德門被之僮僮蘋蘩主饋化成肅雍孟母  
之訓伯姬之恭是嬪是則以號以封立人之道莫嗣續  
大子挺儒宗種德孔邁令伯陳情不仕而忍菽水盡歡  
心乎日愛素髮垂領班衣在身問安視膳眷然晨昏野  
服瀟然林下之秀蘭玉盈庭歲時上壽日薄西山其明  
則東曾是微恙而不及躬起居燕樂曳曳融融彼高明



家具慶則那若母若子為壽如何親不知憂孝養終天  
享此全福幾人則然懿懿夫人足慰下泉臚臚周原瞻  
氣葱朧居河之滄有儼新宮臨拊無憾哀以送終懿懿  
夫人為婦盡道為母有儀彤管有煒千古是徽尚饗

祭王參議文

維中統元年十月甲寅朔二十一日甲戌王惲謹以清  
酌之奠致祭於參議先生之靈藹藹王公維德之宗教  
子以義從師於共走也何幸而與點同氣質一變舞雩

之風文士輩出繫先生之功出來典衛粵惟八年興滯  
貞弊政有後先激濁揚清巨細不捐樂育之心有加於  
前士感公知所立卓然顧惟不肖獨有二天每侍几杖  
接以溫言意向所在多文字間一意作成汝其勉旃家  
貧親老擇我祿仕床下之拜言猶在耳蜀山蒼蒼公筆  
西指董菴之別誠發於中臨岐眷眷告以終始躑躅沈  
鱗有俟乎此孰為歸來便隔生死痛彼知己世罕所遇  
我思古人涕零如雨猗歟先生伊時之麟文彩風流與

道日新既惠我輩亦及我之後人所謂故國非有喬木  
之謂而有世臣我我豐碑表公之墳公維云亡其德在  
民太行盤盤淇流湯湯永懷先生何日而忘

祭王府君夫人陳氏文

大元國至元十二年歲次乙亥二月壬寅朔越日承直  
郎平陽路總管府判官王惲謹以香酌之奠致祭於河  
南路宣慰副使王君太夫人陳氏之靈伏以詩稱有基  
婦道乃隆易讚坤儀徽柔所鍾維夫人之淑兼著一躬

母儀女範嫻於六宗內助既裕化成肅雍彤管有煒周  
南之風嶷嶷賢嗣總角從容以契以分昆仲猶同二十  
年間獲侍左右歲時拜慶稱觴上壽顧畜殊常如卯斯  
覆我草惟纖兄蔚蘭樹突而弁兮載同庠序浹洽薰陶  
亦叨時譽調官南歸四月惟夏升拜北堂德容甚暇親  
哺之食手飲以筆駕言西行辭拜床下中心惻然誨言  
灑灑日薄西山衆雛飛翻云別幾何遽棄榮養聞訃驚  
怛怒焉如喪英英白雲太行之上有淚盈睫悵然東望

嗚呼適去則順其生也榮較丘山與華屋終哀樂而殊  
情懿懿夫人壽踰八旬祔安閒堂慶流後昆是足以慰  
下泉而釋愴悽於蒿焄也憚以官守有限罔獲駿奔既  
已不及撫棺而與謚繫昔賢兮擬倫以陶侃之忠順知  
湛君之聖善以不疑之平反審母氏之慈仁援例私議  
寓哀於文庶幾薦微忱而告精魂也尚饗

禱雨蒼谷神祠文

去冬今春厥旱斯普比聞三方既禱而雨維此衛邦和

氣艱阻草木焦卷種不入土致此咎殃誠守吏不德之  
故也吏不稱職罰及一躬我民何為懼此旱凶嗟嗟四  
民最苦我農止食其力歲期一豐年苟成灾散而西東  
恭惟明靈蒼水之龍哀憫慈惠正直明聰司我雨部山  
靈是宗瀕彼淵地雲雷之宮民以病告禱輒感通忍以  
吏不稱職卒莫救其隆蟲哉願迴哀眷澤我邾鄆乃以  
有秋祀事孔終

祭王參議文

代史運  
使作

惟公奮跡渤海應期挺生婉畫長材廓時之清佐我父  
相幾三十年子惠兵民以謀以旋長淮百戰松漠逾邁  
死生以之而有公在矯矯大節老而彌堅襟融宇粹秉  
心塞淵中牟之仁平陽之賢哀哀衛民賴公以痊膺膺  
周原熙然樂土公雖云亡其政則舉走自恒陽來萬南  
鄘瞻拜遺像齊之益公歌詩知政泱泱大風民懷遺愛  
甘棠是比士而感德曠乎百世矧伊嗣侯義同昆季嗚  
呼哀哉弔罔及哀生不獲事遐想音容河岳流峙野日

荒荒羣飛搶揚公不少留使我涕滂跪而陳辭莫此一  
觴尚饗

春旱禱諸廟文

早自去秋極於今春滌滌衛土如暎如焚夏麥已稿曷  
休我民秋種不入饑饉荐臻旦夕惶懼不知所云恭惟  
明德守臣所欽民以病困神心孔仁用是齋沐以祈以  
禋庶垂哀眷昭鑒微忱風伯回馭山川出雲一變盪氣  
化而甘霖秩我東作庶幾西成載謁祠下冀答鴻靈尚



饗

七夕祭竈文

至元乙亥  
平陽府作

三代之制五祀孔修羣姓時享或春而秋欽惟竈靈並  
與而幽朝烹夕飪一家所由火水相德乃神之休敢致  
薄奠於陘之周有肉如玉有酒斯柔味登于俎香列于  
卣匪物將致匪媚是求久矣斯禱庶答神休尚饗

七夕祀竈漢俗也世久不用獨吾行之多歷年所且前  
人致恭或祈苟得此非予之心也蓋福庖飲食所出五

祀神為最尊薄宦已來餬口四方是神即予主予乃神之客也匪朝伊夕不無溷穀膠撓之瀆惟神念客之故庶有以安之用伸告謝以答神休尚饗

謝龍神文

維至正四年歲次丁卯六月丁巳朔廿日丙子翰林修撰郡人王暉謹以香酒之奠敬祭于縣西平成鄉龍公之神矯矯神龍柄雨之機亢陽為灾非雨則饑士而力農乃分所宜惟百創理一旱則墮霑澤在天屢及我私

疇敢不祇若神之威德也尚鄉食

秋澗集卷六十二